

郭襄靖公遺集

郭襄靖公遺集卷之八

莆中 郭應聘君賓著

年友漳浦朱天球君玉編

門人泰和郭子章相奎訂

門人晉江王任重尹卿校

不肖男良翰梓

奏疏

總督兩廣

蠲免金花銀兩疏

奏爲欽奉

詔書事據廣東布政使司呈查看得惠潮二府屬拖欠隆慶元年起至六年止各年金花銀兩除未奉詔書之前已完銀一千六百九十六兩三錢一分八釐二毫八絲已解布政司庫收貯聽候差官解部外尚未完銀九千四百七十九兩九錢六分一釐七毫二絲委係小民拖欠相應蠲免造冊繳報到臣卷查先准戶部咨該本部題奉

欽依移咨清查計開

詔欸一隆慶六年以前各省直金花銀兩查係小民

拖欠年遠難完者准與全免欽此已經備行廣東  
布政司轉行各道逐款清查蠲免及通行所屬各  
衙門一體欽遵去後今據前因該臣會同巡按廣  
東監察御史鄧鍊覆查無異切照金花本惟正之  
供蠲免實

特異之典隆慶年間廣東地方頻遭兵燹惠潮二府  
尤極彫殘是致前項銀兩歷年逋負追徵不前茲  
奉

覃恩特行蠲免誠小民更生之會除未奉

詔書之先已經徵解司庫者責令順搭差官解部其未完銀九千四百七十九兩九錢有奇節經司道覆查明實委係小民拖欠相應遵

詔蠲免除批行該司將前免過銀數出示曉諭通知免行徵納務使

德意旁敷

聖恩下究小民獲霑實惠如有司敢有撓法重徵者臣等廉實究治外謹具奏

聞

停止鑄錢疏

題爲欽奉

詔書事准戶部咨該本部題奉

欽依移咨清查計開

詔欵一鑄錢本以利民近因鑄造不精私錢淆雜及  
不係產銅去處買運艱難領發行使阻滯不便詔  
書到日各該開局鑄錢地方暫行停止如地方錢  
法通行官民相安願仍前鼓鑄者聽從其便欽此  
已經行據廣東布政司呈稱看得鼓鑄銅錢爲利

至泄始奉明文議于廣州府城開局買銅召匠鳩  
工委官監造通行各府州縣解銀易錢發回行使  
維時散布民間貿易咸稱便益凡私鑄等弊節經  
拏獲重懲如律錢法流通祇因民間用錢止有此  
數而節年所鑄

制錢俱在民間兼以射利之徒潛接外境私鑄偽錢  
雜沓攬用屢經申禁奈岐路頗多偽錢駸廣坐致  
魚目溷珍官私莫辨延今壅滯職此之由今查並  
無買有銅斤在庫相應遵奉

詔書停止等因備呈到臣諒臣會同巡按廣東監察御史鄧鍊看得鑄錢本以濟民行使宜從民便奉行之始官鑄無弊民用有常嗣而人心罔利姦僞漸滋或盜鑄於私家或轉販於外境混亂行使遂致真僞莫分壅滯由起強而行之民始稱不便矣茲奉

詔書頒行該司酌議停止無非便民之意除批行該司將鑄錢器具盡數還官收貯其先造成銅錢見貯廣州府庫一千六百九十七萬五千八百零五



文及各府州縣間有原領回支放未盡者通照原  
議凡支給官吏旗軍俸月糧銀雜役工食等項酌  
量搭發務期消盡免費工本仍通行各府州縣再  
加體訪如有姦猾私造者拏問如律外謹具題

知

蠲免鹽課銀兩疏

題爲欽奉

詔書事准戶部咨該本部題奉

欽依移咨清查計開

詔欵一天下各鹽運司鹽課司提舉司萬曆八年以前額課拖欠并存積年久風雨消折巡鹽御史勘實盡行蠲免如數內已經開中商人赴場聽支者准予辦課贏餘場分自行買補量于割役鹽斤數內扣除欵此已經備行廣東布政司轉行各道清查報司轉報到臣該臣會同巡按廣東監察御史鄧鍊覆查無異切照廣東海北二鹽課提舉司逐年額課俱係竈丁撈採煎辦但鹽田坐落沿海地方中間頽塌靡常是致前銀追徵不完茲奉

覃恩特行蠲免誠小民更生之會除各場已經完納者俱已陸續解部外尚有雙恩鹹水海晏銍峒淡水隆井招收石橋小江博茂九場拖欠萬曆八年額銀三千五百九十一兩三錢五分有奇已經司道覆查明實委係小民拖欠相應遵

詔蠲免除行該司將前項銀數出示曉諭各場通知免行徵納務使

德意旁敷

聖恩下究小民獲沾實惠如各官有撓法重徵者臣

等廉實究治外謹具題

知

蠲免諸色課程疏

題爲欽奉

詔書事准戶部咨該本部題奉

欽依移咨清查計開

詔欸一近年以來四方災報頻仍民困日久一應夏  
秋稅糧馬草農桑人丁絲絹布疋綿花絨戶口鹽  
鈔皇莊子粒屯田牧馬新增草場子粒租銀曆日

防夫水夫民壯弓兵機兵蘆課富戶等項除萬曆  
七年以前帶徵拖欠者已有旨盡數蠲免外其諸  
色課程門攤商稅魚課棗株鈔貫果品等項已徵  
在官者截數起解其未徵分數自萬曆八年以前  
悉與蠲免欽此已經備行廣東布政司通行各道  
清查報司轉呈到臣該臣會同巡按廣東監察御  
史鄧鍊切照前項諸色課程雜稅或出諸額辦或  
取自稅餘固酌盈濟虛之道但中間物力不齊時  
勢或異是致歷年逋負徵納不前茲奉

覃恩特行蠲免誠商民更生之會除已徵完見貯在  
庫銀三百五十七兩三錢七分零照依原議留各  
司府州縣備支軍餉各項外其尚未完銀四萬四  
千一百二十六兩零六釐有奇銅錢九千九百九  
十三文鈔二千二百四十六錠一貫九百八十五  
文皆萬曆八年以前拖欠之數內鹽課充餉銀兩  
委係存留備支官軍俸月糧米及給兵食原非解  
京且與夏秋正稅不同旣經司道覆查明實相應  
遵

詔蠲免除行該司通將前項銀錢鈔數出示曉諭各屬通知免行徵納務使

德意旁敷

聖恩下究商民獲霑實惠如各官有撓法重徵者臣等廉實究治外謹具題

知

議革商稅疏

題爲欽奉

詔書事准戶部咨該本部題奉

欽依移咨清查計開

詔款一天下司府州縣稅課抽分衙門舊有定額近年各路關津貨物經由處所擅立牙行抽稅罔利病民詔書到日撫按司道官查係額外私設者盡行裁革違者兩京科道官訪實叅奏欽此已經備行廣東布政司轉行各道清查報司該本司查得廣州等府屬鹹魚礪砭石渡餉山稅等項通計該減銀一千一百零二兩六錢二分其餘稅餉抽收原有正條難以槩革惟就中疏通稍寬例禁以惠



商販如南雄橋稅胡椒每百斤原定餉銀五錢今減銀二錢蘇木每百斤原定銀二錢五分今減銀一錢湖絲原定銀二兩六錢今減銀八錢又抽分夷船追銀解納事例原亦頗重茲議一等原定餉銀三千五百兩今減銀七百兩二等原定餉銀三千兩今減銀六百兩三等原定餉銀二千五百兩今減銀五百兩四等原定餉銀二千兩今減銀四百兩五等原定餉銀一千五百兩今減銀三百兩六等原定餉銀一千兩今減銀二百兩七等原定

餉銀八百兩今減銀一百六十兩八等原定餉銀  
六百兩今減銀一百二十兩九等原定餉銀三百  
兩今減銀六十兩總計減過各項商稅大約歲亦  
不下六七千兩等因備呈到臣該臣會同巡按廣  
東監察御史鄧鍊切照征商裕餉本爲軍國之需  
而額外濫徵適重閭閻之困茲奉

詔書頒布清查誠

朝廷浩蕩之洪恩小民樂利之至願也臣等節行查  
革期有以仰副

德意萬一今據該司呈開廣肇等府革過鹹魚等稅  
共銀一千一百零二兩六錢二分減去夷貨等項  
共銀六七千兩雖建議之始皆充公用非私設者  
比但錙銖之利商民衣食所資若征權無遺似非  
導利便民之意據呈減革委爲相應其所存應徵  
稅餉半出之商舶橋關半出之民間額稅專備草  
程一應水陸營寨官兵廩糧工食之用中間商賈  
之多寡小民之輸納不能盡齊與夫閏月增給及  
脩船置器等項尚在講求清理期於截長補短樽

節支應似難復有裁抑者除批行該司將前項應革應減稅餉及勒要加報等項弊規揭示通知悉行減革如有司等官敢復有指稱公費擅立名色陽稱已革陰復抽收者臣等廉實叅究外謹具題知

蠲免起存錢糧疏

奏爲欽奉

聖諭事准戶部咨該本部題司禮監傳奉

聖諭朕聞各處帶徵未完錢糧苦累小民著戶部查

節年所欠幾何即今應否悉行蠲免止將見年正供之數勒限完納還會同兵工二部一併議處來說欽此該本部覆議恭候

命下轉行各省撫按官將節年帶徵錢糧備查各該州縣某年某項原額若干除已完外其未完題允帶徵若干內續完若干未完的有若干果係逃亡無主貧困小民拖欠查係何里圖何人名下逐一審明刊刻某年某項下數目徧諭通衢窮鄉人戶斷自萬曆七年以前照數蠲免即將免過花戶造

冊 奏報等因題奉

欽依移咨前來行據廣東布政司呈稱查得自隆慶  
二年起至萬曆七年止廣東全省拖欠原未經題  
請帶徵今應議詳蠲免起運廣西梧州府廣備倉糧  
免調精兵月糧等項通共銀七十九萬九千四百  
八十四兩三錢六分六釐零米三十一萬二千一  
百五十六石四斗一升零查俱小民拖欠原係地  
方起運存留錢糧非解京本折之數惟內一項弓  
兵銀原爲巡司防守而設後因事建議中間有扣

解部濟邊者有解司府充餉者有留防守之需者  
查見奉

恩詔開有弓兵應免之列且此銀原同一項編徵俱  
應議免等因冊報到臣該臣會同巡按廣東監察  
御史鄧鍊覆核無異切照前項稅糧皆係歲派定  
額小民惟正之供祇緣地方連年多事荒歉靡常  
是以杼軸告空逋負歲積茲荷

皇上軫念民隱特行清查誠邊氓翹首蘇息之會也  
所據該司查過各府州縣萬曆七年以前未完銀

共七十九萬九千四百八十四兩零米共三十一萬二千一百五十六石四斗零俱係小民拖欠原未經題

請帶徵之數內弓兵銀兩雖有解部解司府之不同  
據該司稱係原同一項編徵俱應據實奏  
請以俟該部覆議蠲免者也伏乞

勅下戶部再加酌議上

請定奪行臣等轉行所屬遵奉施行謹具奏  
聞伏候



勅旨

免徵夏秋稅糧疏

題爲欽奉

詔書事准戶部咨該本部題奉

欽依移咨清查計開

詔欵一天下稅糧除萬曆八年九年十年照舊徵解  
其萬曆十一年各項稅糧不分起運存留准免十  
分之三以蘇民困欽此已經備行廣東布政司轉  
行各道清查報司備呈到臣該臣會同巡按廣東

監察御史鄧鍊切照民屯夏秋稅糧本皆額派之數茲奉

覃恩蠲免十分之三總計該年分廣東通省應免民糧米共三十一萬零九十七石三斗六升零屯糧米共五萬零四百四石五斗零

渥澤徧霑於普率歡聲徹動於閭閻臣等責在地方何幸祇承

德意除行該司將應免應徵數目轉行各衙門遵照揭示軍民人等通知依期照數上納以蘇民困外

謹具題

知

薦舉註誤將材疏

題爲

開讀事准兵部咨該本部題奉

欽依移咨前來計開

恩詔一欵各邊將領平昔謀勇出衆累立戰功偶因  
失事及註誤革職閑住立功充軍等項年力未衰  
尚堪任使者詔書到日限三箇月以裏撫按官查

訪的實疏名奏聞又

恩詔一欵沿邊沿海緊要事重鎮委用各營名色  
千把總無實職者若係旗舍或係三科武舉果謀  
勇過人効有勞績聽總督撫按官指實奏薦量授  
署所鎮撫俟後更有勞績方准與實職官一體推  
用其軍民納授服色者原不在聽用之列不許乘  
機混冒欽此已經備行廣東按察司轉行各道清  
查報司該本司細加查訪得原任廣東都司僉書  
祖萬松慕學壯志均抱請纓膂力俱堪躍馬猷爲

未展其平生之素勲業可冀於末路之興雖皆被  
論閑住然揆其才似難終弃又原任廣州惠潮海  
防叅將署都指揮僉事魏宗瀚勇冠三軍才堪一  
面智信足以威外夷果敢爲能嚴內政在閩屢獻  
俘獲之績任廣尤多勘定之功僉謂一時元戎遽  
緣註誤蒙譴續以立功自贖尤克隨事效勞此其  
忠勇獨優似應破格錄用原任南韶守備沈燦碣  
石塞把總朱相智堪料敵勇亦兼入危險備嘗山  
海慣歷皆係被論問軍贖免回衛又總兵標下前

營名色把總徐成久習波濤歷經戰陣效有勞績  
雅負才猷似應照例舉薦與祖萬松等俱謀勇出  
衆年力未衰尚堪任使似應甄錄等因備呈到臣  
該臣會同巡按廣東監察御史鄧鍊照得將材難  
得而邊海之材尤難彼溺於紃袴狃於燕安無所  
短長之效者比比而是間有負橫槊之能堪折衝  
之寄乃或因詿誤譴斥而卒莫能振奮者亦多若  
非略其既往開以自新將終歸於廢棄何以濟地  
方緩急之用哉茲奉

恩詔廣行羅蒐仰見愛惜將材至意臣等待罪地方  
祇承

明旨通行司道各官虛心查訪據報前來臣覆加詳  
覈除才力庸常無裨於用者雖經司道開報俱不  
敢槩及外所有曾在地方効力今註誤授閑及雖  
係別省衛所今在地方領事人員皆臣耳目所嘗  
睹記者謹據實開列以俟

採擇查得原任廣東都司軍政僉書署都指揮僉事  
祖萬松洞識機宜周知夷險從征而屢收奇績司

聞而懋著弘猷原任廣東都司軍政僉書署都指揮僉事慕學勇且知方威而能惠督江防夙稱籌畫署中路近效勲勞此二員者皆係被論回衛閑住今其年力尚強克稱任使所宜量才錄用者也原任廣州惠潮海防叅將署都指揮僉事魏宗瀚才練達而操縱自如志奮揚而艱險罔避閩海功收三捷河源馘奏四千此一員者即其進征阻誤適當三軍未整之時原其任事忠誠真有萬夫莫禦之勇今懲創已久年力正強所宜破格早爲錄



用者也原任南韶守備南雄所指揮僉事沈燦事  
不避難才堪禦侮練營兵紀律素定領哨務俘馘  
居多原任碣石寨把總署指揮僉事朱相久歷戎  
行熟知戰陣閩著剿倭之績粵稱拔寨之能此二  
員者皆因失事叅論充軍沈燦近經遇

宥豁免朱相亦已有功准贖年力俱壯猶堪策勵所  
宜並從錄用者也總兵標下前營名色把總徐成  
心有機謀識且明敏素勤訓練之畧亦多擒勦之  
功此一員者原係浙江金華所小旗援例鎮撫未

有實職但見在地方領事相應併薦以俟酌量推用者也伏乞

勅下兵部再加查訪如果臣等所言不謬將祖萬松等覆議收錄庶跣跣之材不至於終弃而感激之效益勵於將來矣謹請

旨

設復潮州叅將疏

題爲

請乞設復叅將官員以便控制事准兵部咨該本部

題覆臣等原題爲強賊白晝擁突縣堂劫奪庫獄  
當被擒斬查叅失事官員以重地方事本部覆議  
內開潮州守備駐劄府城即以潮州所屬海陽與  
程鄉等十縣地方惠州叅將駐劄海豐即以惠州  
所屬長樂等十縣地方各責成管理一面行令遵  
照今定信地施行不許推諉如革裁叅將之後地  
方不便統轄仍應復設撫按官即議妥會

奏等因題奉

欽依移咨前來已經行據嶺東守巡二道會呈前來

臣即批仰廣東布政司覆議通詳隨據該司呈稱  
會同議照潮州爲東廣之上游全粵之藩籬也其  
始以總兵鎮守其地後雖更置亦必屬之叅將要  
在權力足以彈壓地方期於乂安而已頃奉裁省  
叅將易以守備本爲節約之舉奈潮州之境上易  
動難馴而守備之權力自與叅將迥異兼之信地  
又遺程鄉平遠而不之屬坐致程鄉庫獄之變實  
隱伏之釁不周之虞也雖潮漳共設有南澳副總  
兵一員實祇控扼海外其潮之陸路貌不相關是

水陸之主將可相有而不可偏無也今談二道叅酌輿論必如惠州漳州事例復設潮州叅將一員統轄十縣地方將守備裁去委爲相應等因備呈到臣該臣會同巡按廣東監察御史鄧鍊照得政貴通變患在預圖廣東潮州一府壤接南贛汀漳距省獨遠地方綿邈嶺海粵區先年鎮以總兵後乃代以叅將續裁叅將而移守備駐守更置不一事權漸輕且所轄止海陽等七縣而程鄉平遠二縣未有分屬以致防範不及庫獄之警有自來也

卽今真賊雖已就擒庫銀亦盡追獲顧居安不可  
忘危蓄威必專職守所據該司道議革守備設復  
叅將俾事權稍重責任自專調度防禦之間俱得  
其便委爲地方要務相應依其所議伏乞

勅下該部再加查酌如果臣等所言不謬覆議上  
請准將廣東潮州設復叅將一員統轄海陽程鄉等  
十縣地方推選相應官員頒給

勅書嚴限前來管領兵務合用廩餼雜流員役聽臣  
督行司道查酌處給其潮州守備一員裁革見任

守備陳經翰回衛別用庶將權增重戎務益脩地方賴以保固矣謹請

旨

致仕寺卿病故疏

題爲致仕寺卿病故事據廣東布政使司呈奉前任督撫臣陳瑞批據廣州府東莞縣申詳原任光祿寺卿鍾卿病故緣由奉批仰廣東布政司查例詳報依奉該本司看得原任光祿寺卿鍾卿雅志不羣清風可仰刺州作郡咸著循良之稱總憲豁

藩夙負經濟之望顧設施未竟遽興高尚之懷雖  
召命方殷益堅恬退之節鄉評素重

恤典宜加請乞裁議具

題等因到臣該臣會同巡按廣東監察御史鄧鍊看  
得光祿寺卿未任致仕今病故鍾卿操脩端潔歷  
三紀而夷險備嘗志行高明甫六旬而烟霞甘遜  
久孚士論無間鄉評相應遵照題

准事理據實開列所有

恤典聽該部查議臣等不敢擅擬謹具題



知

勘報程鄉賊情疏

題爲逋賊盡獲庫銀已完議處失事人員事據廣東布政司分守嶺東道左叅議韓紹按察司惠潮兵巡道副使鄭岳呈奉臣等案驗行道依奉行據潮州府申稱原突劫程鄉縣庫獄各賊除已擒獲外脫逃賊犯鍾大魁陳廷器囚賊李環俱已擒獲原欠庫銀二十三兩三錢四分追據地方徐子正等首繳補足並無短少等因到道該二道會同覆

覈得原劫程鄉縣庫獄賊徒初自網船而來其名有限及至縣內放出囚賊則其數即至三十名矣此通衢白晝之間人所共見當時隨發隨滅只有此數其未獲者亦悉於限內生擒並無隱多報少之弊庫銀有于賊身搜出有據地方首繳皆係所獲正犯真贓已經各官驗明未完二十三兩亦已追足並未聞有湊補之說失事各官應究應免伏候裁奪等因到臣據此案查先准兵部咨該本部題覆臣等原題爲強賊白晝擁突縣堂劫奪庫獄

當被擒斬查叅失事官員以重地方事本部覆議  
合候

命下將知縣蔣蒙古照不謹例革職閑住本部移咨  
兩廣總督及咨都察院轉行巡按御史督行該道  
嚴查前項賊徒是否止於二十餘人或是避積至  
百以上之數隱多報少擒斬追出賊銀是否正犯  
真贓或係縣官別行湊補仍將本城衛所等官吳  
卿等責令住俸戴罪緝捕姑准寬限三月內將未  
獲賊囚三名未完庫銀二十三兩上緊緝拏追獲

完報如過限不能盡獲即將軍衛有司查照條例  
并守巡官俱從重叅

奏前來以憑覆

請定奪等因題奉

聖旨該縣強賊敢於白晝劫庫失事重大蔣蒙古著  
照罷輦例冠帶閑住吳卿等住了俸戴罪緝獲務  
要盡數拏獲其餘俱依擬欽此移咨到臣已經案  
行嶺東守巡二道會查確報去後今據前因該臣  
會同巡按廣東監察御史鄧鍊看得程鄉縣治負

山臨海兼以信地未分兵防未固姦宄窺伺非一日矣以故鍾花嶺鍾大魁等以二十餘徒白晝突入執辱縣官以拒其援奪放獄囚以助其勢遂合至三十之衆劫庫銀九百有餘雖幸當時擒獲殆盡而首惡尚逸公帑未完當該臣等嚴督分投追捕不越三月之內已經盡獲送官所據道府查係正犯真贓數寔止此並無隱多報少及別行湊補之弊似爲明確其失事各官除知縣蔣蒙古已奉旨罷職無庸別議程鄉縣巡捕典史吳卿掌程鄉所

印潮州衛指揮僉事劉宗泗哨江程鄉所副千戶  
蕭若琳守把北門副千戶王欽巡捕百戶李吉潮  
州府掌印帶管捕盜海防同知何敢復惠潮兵巡  
道副使鄭岳等應否照依新定條例免究臣等未  
敢擅議通候該部酌處者也伏乞

勅下兵部再加查議上

請定奪行臣等轉行各官遵照施行

請重廣東總兵官事權疏

題爲帥臣威望素著地方倚藉方殷

請乞申法令重事權以保安疆圉事臣惟廣東地方  
山海遼濶而惠潮諸處自昔號爲盜藪原設總兵  
官一員駐劄程鄉平遠之伸威營至嘉靖四十三  
年該前督臣吳桂芳議以平遠聚落漸成改移潮  
州府城駐劄嗣因反側之徒隨處蠢動遂回劄廣  
城居中調度繼之者輒相沿安住會省視各路山  
海軍體漠不相關甚至坐談成敗若秦越然而各  
路叅遊守把等官以及沿海衛所衙門一切事務  
遂亦多不關白以致總哨之虛冒軍兵之脆弱戰

艦之敝壞糧餉之虛糜總兵官向不巡閱稽督任其耗蠹卒有寇警付之不聞將焉賴之此雖任是責者未盡得人亦由法令之未申事權之不重故也今照鎮守廣東地方少保兼太子太保中軍都督府左都督戚繼光忠誠報

國智勇擅時勛伐夙著于閩南海邦頌德威烈久騰乎薊北胡虜寒心頃聞

命以疾馳部曲溫如挾纊肆先聲之遠播兇頑懾爾投戈甫任封疆懋摠經略汰標兵之疲弱而盡發



寧家月餉無冒濫之弊收流寓之精勇而編入營  
伍地方無隱伏之虞躬訓練以蓄威號令一新乎  
嶺徼精器械以利用旌旗改色於炎荒是誠全粵  
之長城

清時之名將也但軍政久弛山海多虞若非大破常  
調申嚴紀律使各路將士知有主帥之令一變頽  
靡之風不惟於地方無裨亦豈本官之素志哉伏  
乞

勅下兵部再加查議行令廣東總兵官戚繼光居常

駐劄省城不時巡歷惠潮柘林碣石以及廣肇南  
頭廣海恩陽等處整飭兵戎振揚威武稽覈訓練  
等項得以便宜督理叅遊以下並聽節制約束間  
有貪縱不職怯懦無爲者據實叅呈以憑酌議題  
請各有司等官須接見如禮一切兵機賊情併報總  
兵官以便調度不許偏執阻撓致悞機宜如此庶  
體貌優隆事權展布而地方永有攸賴矣

具報存積餉銀疏

題爲具報任内存積餉餘以效微忠事案照先准

戶部咨該前任總督兩廣右侍郎劉堯誨題前事  
本部覆議恭候

命下移咨兩廣總督衙門將督撫劉堯誨任內積剩  
扣存司府縣庫餉銀并存積肇慶府庫貯梧鎮銀  
兩各另封貯非奉

明旨不許擅自那用其該省軍餉督撫查追一歲所  
入即爲一歲所出如有積餘照前存貯交代之日  
卽將已貯前銀及任內存積數目具本

奏報等因題奉

聖旨是欽此續又准戶部咨准前任總督兩廣兵部尚書致仕陳瑞咨報亦同前事到部移咨前來俱經通行遵照外今臣自萬曆十一年三月初三日與前任總督兩廣尚書陳瑞交代至今年正月初一日接報轉任所有任内存積過該年分銀兩相應遵照原題事理具報隨行據廣東布政司通行各守巡等道備細清查報司冊報到臣查得該司冊開周歲之中除詳允脩船製器及官兵行糧閏月工食等項支用外通計布政司見扣貯并各屬

解回曠餉銀共二萬零二百六十一兩一錢零各屬見扣貯庫共銀三萬一千二百二十六兩四錢三分零臣覆加查覈無異切惟前項餘餉分毫皆小民之膏脂也苟稽覈弗嚴則虛冒侵漁及濫費之弊勢所必至臣自受事以來節經督行各守巡兵備等道及副叅遊守等官將各處水陸官兵汰其老弱蠲其浮冗按月糧食俱要唱名散給間有虛曠事故等項盡行扣存貯庫並無別項支銷今計周歲扣存司府等庫收貯餘餉通共銀五萬一

千四百八十七兩五錢三分零皆係臣任內一年存積之數除行令該司通行所屬各府州縣將前項餘餉盡數解赴布政司湊同該司原扣存餉銀併貯與前任督撫臣劉堯誨陳瑞各

奏報銀兩俱照舊全數貯庫所司分毫俱不得擅自那用其尚有應扣額銀各屬拖欠未扣者嚴行徵解存貯外謹具題

知

辭陞兵部尚書疏

奏爲懇乞

天恩辭免戎曹重寄以安愚分事臣於萬曆十二年正月初一日准吏部咨該本部題奉

聖旨是郭應聘改南京都察院右都御史欽此欽遵備咨到臣交代起程間本年二月初八日接到部報內開南京兵部尚書員缺該吏部等衙門會推奉

聖旨是郭應聘陞南京兵部尚書叅贊機務寫勅與他欽此欽遵伏念臣本草茅凡品章句迂儒遭際

聖明濫塵

任使久假撫循之寄載膺節制之司歲月虛糜涓埃  
靡效朴忠徒抱綿力弗前仰賴

帝德旁敷封疆著定詎期

皇恩游逮

召命寵頒感激

鴻慈矢殫駑鈍以收末效以畢愚衷者此臣之心亦  
臣之分也顧

留都爲根本重地而兵曹廼機務要司責任匪輕稱



塞未易非強壯之力精敏之才不足以堪是寄如  
臣才能素劣氣稟原虛瘴厲久侵痰火時發卽閑  
散之秩已爲弗勝矧艱大之授豈所能副臣若不  
自揣量冒然就列至鞭策而不能進掣頓而不能  
施其曠臣職負

主恩罪將何以自贖哉爲此披瀝

上陳伏乞

皇上俯察愚誠收回

新命別選才望素優者以充是任庶機務之叅贊有

裨而微臣之愚分少安矣臣不勝屏營祈懇之至  
謹具奏

聞伏候

勅旨

薦舉境內人才疏

題爲薦舉境內人材事臣奉

命總督兩廣今叨轉任其於境內人材例應薦舉訪  
得原任南京禮部尚書今致仕何維栢懿行足媲  
古人直節可風流俗耽經史學有淵源絕塵囂望

崇山斗允

三朝之耆舊爲四國之典刑原任應天巡撫都御史  
今回籍海瑞孤騫天挺蚤成骨鯁之名窮約性生  
自甘蓬蓽之操藏足廉頑激懦出能陳善獻忠原  
任浙江按察司提學副使今閑住林大春材優經  
濟握兵憲于三藩學貫古今公文衡于兩浙山林  
瑜瑾士類羽儀原任江西按察司副使今降典史  
黃可大奮揚之志倜儻之才歷藩臬而夙樹風猷  
伏衡廬而益堅清節原任四川布政司叅議今聽

調陳堂行端方秉憲時稱直謹才宏練參藩績茂  
旬宣性不與世以同流器足及時而大用原任浙  
江台州府知府今閑住李光宸司邊餉夙著清白  
之風握郡符丕振循良之譽名節素稱砥礪強壯  
正可驅馳以上諸臣皆東粵人才之賢而在野所  
當薦揚者也其西粵人才該臣巡撫轉任已經薦  
揚不敢再瀆

天聽伏乞

勅下吏部再加查訪如果臣言不謬及時錄用庶野

無遺賢而

聖治爲益光矣

舉劾方面官員疏

題爲舉劾兩廣方面官員事臣奉

命總督兩廣軍務已及一年今叨轉任於所屬方面  
官員例應舉劾緣大計之後各官多係新任臣即  
其賢聲素著及遺怨猶騰者謹據實開列訪得廣  
東布政司分守嶺南道左叅政徐儒性秉冲和衷  
存謹恪備兵左江而水陸息警分藩南嶺而士庶

歸心嶺西兵巡道右叅政兼僉事徐汝翼丰儀岳  
立不浮操履冰清並瑩西嶺懋籌兵之畧東山成  
靖寇之勲廣州巡海道兵備副使今陞分守嶺西  
右叅政朱東光才可遺大而投艱事惟正身以率  
屬澳中奸回斂戢海外氛祲全銷分守海北道右  
叅議陸萬鍾量博而守之嚴才弘而鎮以靜闔澤  
洽三城之頌清風滌兩海之塵廣東按察司清軍  
驛傳道副使劉倬襟度坦爾光明才猷豁然敏達  
郵傳之濫供悉汰伍符之蠹弊咸清提督學校副

使支可大提躬價重南金挾藻光騰東壁造詣純  
兼優華實品隲當共服鑑衡惠潮兵巡道副使鄭  
岳諫垣夙著風裁分臬獨持憲紀節約而澄清潮  
海指顧而銷弭潢池海北兵巡道僉事薛夢雷廉  
問久揚於珠海芳勲懋著于雷陽持憲已踰四年  
頌聲如出一口南韶兵巡道僉事王民順通達有  
用之才端凝特立之操肅關防吏奸屏息揚威武  
擒寇輸誠羅定兵備道僉事鄭人達戢兇頑蒸庶  
驩同時雨任艱鉅新區倚若長城守絕脂膏識優

盤錯廣西布政司右叅政兼按察司僉事府江兵  
備帶管分巡道事葉朝陽沉毅有爲精明不眩飭  
江防而懾諸巢醜類擒酋寇而安二邑生靈廣西  
按察司清軍兼理驛傳副使彭應時操行粹然精  
白當機確有執持搗巢績著于萬全攝篆力祛乎  
百蠹右江兵巡道僉事今陞分守左江左叅議王  
廷簡惇厚出以精詳光明本諸縝密十寨之隄防  
有要諸酋之制馭苦心以上諸臣皆兩廣藩臬之  
良所當薦揚以備擢用內左叅政徐儒係廣西陞



任右叅政朱東光係本省陞任皆臣督屬例應併薦者也又訪得廣東布政司分守嶺東道左叅議胡心多猜忌志復卑汙入境而橫索鋪行郡爲罷市下車而廣收贄餽幣至盈庭取潮州贖鍰三百兩托以故舊候禮反致張副使之蒙疑借惠州庫貯二百金付其親男還鄉至貽黃知府之代補受蔣知縣三百金免其督責矣而胡縣丞蔣典史以下亦各索受不等誅求幾遍於屬僚受成叅將二百金許其薦拔矣而陳守備范千戶以下亦

各索受有差賄賂肆行於武弁巡歷訪拿一行計  
百餘人而悉擬有力惟求私索之充盈准收詞狀  
每次計二百紙而槩問不應罔顧民膏之殫竭任  
蘇百戶誑詐富民李知府方行究治輒恣苛求卒  
令稱病而不安其位縱王知縣貪殘剥下鄭推官  
方行揭報輒加忿斥卒令患疾而不保其軀不惟  
黷貨無厭而且淫刑以逞審錄潮海鞭笞人犯動  
六七十名慘虐太甚督冊惠來酷傷總書至四五  
十命寃抑曷伸門子王壽其腹心也復痛責其與

子爭賄人嗤乳虎之胥戕健步曾君守其牙爪也  
復大縱其下縣索錢衆苦蒼鷹之肆毒此一臣者  
官箴大壞公議難容雖經降調未盡其辜所當罷  
斥以警有位者也伏乞

勅下吏部再加查訪如果臣言不謬將徐儒等循資  
擢用胡 罷斥庶勸懲旣明而羣寮益肅矣

舉劾有司官員疏

題爲舉劾兩廣有司官員以肅吏治事臣奉

命總督兩廣今叨轉任其於所屬有司官員例應舉

勅訪得廣東肇慶府知府王泮博雅五車具富清  
脩一硯不持折鉅獄矜恕常存撫窮閭教養兼至  
瓊州府知府許一星清茂而力可砥澗敏練而志  
堅茹藥惠愛覃敷海外聲華丕播粵中潮州府知  
府郭子章負青齡而才稱剽劇秉素節而念切興  
文政學兼長士民交戴高州府知府李熙秉溫恭  
之器度擅明敏之風猷勤政夙夜匪遑裊躬冰霜  
並瑩惠州府知府黃時雨精敏練達果斷廉平虞  
寇警而防遏多方察屬僚而臧否攸當廉州府知

府沈應科惠愛本於忠誠精明將以謹飭處荒邇  
允稱保障假盤錯尤展鋒芒雷州府知府陳贊器  
格端凝猷爲審固法比精而獄無遺照防閑肅而  
庭有餘清韶州府知府蔣思孝遂養渾如韞璞精  
輝無異鍊金崇節愛民瘼勤咨志澄清吏治頓肅  
肇慶府同知董石鍛鍊而才益拓砥礪而志彌堅  
防海允靖鯨鯢練兵足資保障韶州府同知秦應  
驄宏博有爲精明不露照獄著懸衡之斷詰戎察  
漏網之姦惠州府通判馬伋材精閱歷志勵困衡

權稅而廉靜有聲查盤而公平得體廣州府推官  
陳紹功蘊藉宏文堪倚馬讞訊確明埒然犀才守  
兼優聲實並著肇慶府推官唐民敏丰神英雋幹  
局精詳關防密門絕苞苴剖折明犴希桎梏羅定  
州知州胡相精勤任事廉恪持躬守邊城勢固金  
湯撫殘黎戴殷乳保番禺縣知縣楊言處左官斂  
鋒不露理劇邑游刃有餘懋著廉能允堪艱大增  
城縣知縣游應龍器度粹若金精才猷充如犀利  
一塵無染百廢具興新會縣知縣袁奎英茂老成

精敏持重燭弊端洞如觀火勵嫖節再見懸魚順  
德縣知縣葉初春精華不呈芒錫粹白堪比圭璋  
吏蠹盡釐刁風帖服東莞縣知縣譚一召心事光  
明猷爲敏達發新硎于海北騁熟路于莞東高明  
縣知縣張佐治百鍊彌堅一介弗苟清約不殊寒  
素敦誠足擬古人廣寧縣知縣黃南金處炎荒力  
披荆棘撫殘庶念切招徠循績著稱良工獨苦潮  
陽縣知縣章邦翰青年銳志偉識通才丈量最得  
乎民心聽斷不撓於豪右徐聞縣知縣蔡宗周寓

嚴明於渾厚濟敏達以精勤庭解冰清閭閻春燠  
惠來縣知縣蔣一清節槩著於揮金聽斷恢乎迎  
刃賢聲夙播治行足嘉長樂縣知縣胡夷簡性資  
凝重政體通明清案牘吏杜舞文罷追呼民皆安  
堵陽春縣知縣黃憲清潔已清公庭之蠹吏束于  
程推心恤疲邑之窮民安其業廣西潯州府知府  
江萬仞操持彌久彌勵才諳愈練愈精績擅二千  
石之良聲騰數萬戶之頌慶遠府知府王文炳爽  
朗出以從容廉靜非由矯飾脩郡志作興人文拯



曠灾恤勤民隱太平府知府王命爵負清才而能  
 斷滌素履於不緇却賂屈强酋之心節費騰疲民  
 之頌柳州府知府陳大猷端凝之度謹恪之心清  
 賦額而惠及荒疲繕營堡而功存保障平樂府知  
 府周祈器宏而融通不滯見定而注措咸宜釐胥  
 吏之叢姦杜民夷之釁孽南寧府知府陳紀中有  
 權度動合準繩賦稅定而諸屬肅清保甲行而一  
 方倚賴平樂府同知鄭應齡貞操持以始終邃學  
 通乎今古善政成四年之績賢聲冠五嶺之西柳

州府同知漆文昌智慮沉潛性資潔慎征寨之勞  
夙著樹桐之績有成平樂府同知管理賓州事饒  
敬承鎮定不浮通明有執濟師徒於境上奠民獯  
於席間柳州府通判石元麟材華警敏年力精強  
署符而政譽已騰勘事而輿情咸服桂林府推官  
李道先明如懸鑑利比運斤操脩之峻潔不允風  
采之振揚自別慶遠府推官劉學易材猷明鬯氣  
質清腴勘事力卻常規攝符克崇實政橫州知州  
丘鏞才諳精於閱歷惠愛普於廉明卓有古人之

風允稱循吏之績左州今改鬱林州知州江龍禔  
身慎而且恕當官廉自生威佐郡夙有聲稱綰州  
允期治效永寧州知州顏志邦司郡理久著賢能  
撫州岷益占惠政志趨素定年力方強新寧州知  
州陳躍潛志勵夷荒才優民牧復侵地壓稅不征  
禁濫科僞章立辨靈川縣知縣陳一洙才裕而志  
操彌堅學優而政體益達績課六載守有一心臨  
桂縣知縣邵以仁賦材敏練操行端嚴處劇而批  
解無難當機而執持不變荔浦縣知縣呂文峯撫

四境之黔黎兼優才守控萬山之椎髻迭用競練  
懷遠縣知縣李惇安心以處邊地推誠以撫殘民  
懷徭帖然融封兼理昭平縣知縣方思賢身獨任  
乎勤勞志能甘於恬澹單騎而行賊壘創學以變  
蠻風富川縣知縣周篤棐幹局素優操脩克慎田  
糧留心清覈人文加意作興以上諸臣皆兩廣有  
司之良所當薦揚內知府沈應科郡屬僻簡未盡  
展布應候本省衝繁府缺移補以盡其才知府江  
萬仞閱歷已久夷情素練應候兩廣兵備員缺陞

補以責其效知州胡相報陞慶遠府同知已有雷  
州府通判濮陽裴陞補但濮陽裴因給由在途聞  
報隨即告病繳憑該臣等議留胡相仍以同知職  
銜管理州事一向在任應候該部議處者也又訪  
得廣東廉州府同知嚴 險以傾人姦以濟欲揭  
時事有如捉風擠僚友同于下石署郡則各縣解  
銀火耗倍取考滿則各屬餽禮花幣充盈把總吳  
紹中賂以金杯則曲爲薦用武舉張齊程遺以銀  
貨則恣其營求陳政舉朱念六盜珠之賊也責聞

近地富民而嚇騙張耀等多賊方從釋非蔡紹先  
鄭克仁賭博之首也勒報四廂子弟而接受李本  
等重賄始獲寬刑變賣蛋賊婦女計銀四百有奇  
是倚之爲市也索受庫吏常例計銀二百之外是  
縱之爲奸也廣搜細葛而止償半價鋪行之謗議  
沸騰多儲低錢而抵作月糧軍士之怨聲載道稽  
覈兵食本專責也則任官兵虛冒而漫不經心督  
造兵船至切務也則任總哨侵分而甘於染指縱  
親男宴遊于街市開家之義已乖寵猾吏出入於

私衙嬖下之跡難掩大節旣隳小才何取廣東化  
州知州祝心術多乖操持不檢受州同黃仁孚  
之厚餽而用爲入幕私賓遇事從其播弄匿賊總  
劉國沾之逋逃而引爲後衙書手當官任其恣睢  
李本華以犯事在官則憑萬氏家過銀六十兩而  
徑從輕放應元以謀命聽理則因董老人過銀四  
十兩而准與私和占田殺人罪應抵償黎惟剛毆  
死獐人謝惟敘而反坐瘡死誣告則以兄黎惟常  
之納賄也強盜禦貨律應擬斬翁世興等橫劫商

人張隆鄭試而擬爲徒罪遇赦則以吏周詩之通  
賊也賀成二姚必亨二人埋銀二千兩被盜掘去  
則盡行追沒僅將贓銀五百報官遂起流言之嘖  
嘖興賢永平二里斂銀數百兩賁緣潜通則不行  
清丈反將額田加米充數不恤逃徙之紛紛受黎  
吏之多金串隱新收田糧計其詭匿何啻七八千  
畝勒村民之常例擅給冠帶帖照計其索取不下  
二百餘金且昏夜罔畏四知移吏室於花園之畔  
致白帖遍遺一邑騰民謗於竹梯之踰雖屬曖昧



之情大貽名檢之玷廣東曲江縣知縣今陞儋州知州牟

才本遲鈍志復卑汙政不先於勤民而惟急媚上訟不求其當罪而多事徇私罷吏曹汝楠旣受其賂而起文復納矣且令之出入私衙而不爲嫌積棍何見樵旣信其奸而聽囑過財矣且携之往來鄉落而不知禁差銀減編業有成議乃每歲多編八百兩節年榜案見存稅糧追徵原有定數乃每兩加耗八分通縣里排共證秤收遇仙橋稅歲計五千則每兩加銀一錢不恤商人受

累致囂鬧於公堂發解司府錢糧歲幾四萬則每  
百扣減三兩責令銀匠滴賠致訴理於當道張朝  
聖因人命索銀二百兩過送寵吏者曹汝楠也鄧畧  
因姦情入銀三十兩過送者門子陳見龍也清丈  
田畝則濫加拷訊至輸金納貨而始免抽查問理  
狀詞則槩擬有力至鬻女賣男而始免杖併曲江  
之穢聲久著儋海之蠹政復滋受顧州同之銀器  
而縱其誅求納張吏目之土儀而任其恣橫多端  
行賄百計求償此三臣者皆官箴大喪民怨已深

俱應照不謹例罷斥者也廣西平樂縣知縣今陞  
靖江王府審理陸性朴而法體未諳材庸而

事權旁落吏無解舍縱兒童雞犬雜沓於公庭官  
不追徵任皂壯吏書驛騷於村落條編之完欠無  
稽致差役侵漁大半而盡稱逋負錢糧之支銷無  
法致庫吏那借滿百而向失追償信吏役王惟臣  
舉報義民而乘機多索常例被訪有因審生員劉  
作霖強奪田畝而徇情不具招詳駁查不悟文移  
盡憑吏書經年寢閣公費輕用里甲每事糊塗民

牧固爲非宜劣遷亦難克稱此一臣者綿弱無爲  
檢防大弛應照罷軟例閑住者也廣東信宜縣知  
縣王 目力已昏志行復陋詞訟借左右爲視聽  
任其低昂秤收憑胥吏以重輕何分多寡拖欠人  
戶旣經宥矣乃匿其明文而復行追比偏累貧民  
冒籍生員旣出貢矣乃嗔無謝禮而自扣盤纏貽  
譏士類王光信妻逼死梁氏大故也則以受賕而  
從未減彭子懷強姦張氏誣首也則以納賄而始  
輕釋丈田改移不定里排至科費多金罔恤民膏

之已竭罰穀折價爲常阜壯至追呼滿紙不思官  
守之當嚴撥守城而責及婦女致起怨咨督脩署  
而動罰鍰緡遂招告訐軍民不服展措終難廣東  
開建縣知縣葉志念怠於改官智識昏於嗜

欲里長索受銀兩准免勾稽鋪行取用貨物不給  
價值答應夫馬俱責之鄉落之民匿官銀而入已  
管理稅契專委之心腹之吏違榜例而加收龍福  
所犯者姦情得賄而始釋過付者門子黃大龍也  
胡應鳳所犯者人命受賕而輕縱承行者工吏譚

繼先也演戲謝神本細事耳劉少南罰銀二十兩  
併罪巫師娶妾被告本匿名耳康春富罰穀二十  
石不登憲票葉禮興以逃役之故輸穀六十石是  
屬何名袁瑞珍以傷命之故輸金六十兩是果何  
法民怨雖曰未深官箴已爲有玷廣西洛容縣知  
縣鄧性喜自用識闇當機初政而營縣改驛  
不避怨勞踰年而恣意任情遂招譏議秦世厚執  
訴隊長覃尚恩縱兵害人已經申革也而顧復役  
差遣以縱其姦徐勝保讎告撫徭潘錢平助賊爲

虐未經申詳也而遽發兵擒縛以激其變新兵一百名則虛冒居多而扣銀入已民歛四十名則乾沒幾半而徵價充囊江客寓運江村病故廼聽其誣賴而橫罰良民范必四銀八十兩衆所周知湖客被長安鎮打死廼訪其私和而濫罰地方羅一元等十七人事寔難掩沒歲編祭祀鄉飲銀五十餘兩絕不舉行侵額派協濟夫馬銀二百餘兩別令抵役強奪民人陸有餘良馬而即以裝船還籍其志何厭勒取民人莫廣文耕牛而指爲起學塾

土其計尤拙此三臣者皆官守有疵民牧弗稱但  
王 年力尚壯應從調簡葉 鄧 文學猶堪應  
從改教者也伏乞

勅下吏部再加查訪如果臣言不謬將知府等官王  
泮等循資陞擢行取同知嚴 知州祝 年 罷  
斥知縣陸 閑住知縣王 調簡葉 鄧 改教  
庶淑慝攸分而吏治益勸矣

舉劾武職官員疏

題爲舉劾兩廣武職官員事臣奉



命總督兩廣今叨轉任其於所屬武職官員例應舉  
劾訪得鎮守廣西地方總兵官中軍都督府都督  
僉事呼良朋謀勇兼資勲名夙播閩南秉鉞氣吞  
海上之鯨鯢粵右佩符勢壯山中之虎豹已見揚  
威於邊徼更思破浪於長濤此一臣者固宜于東  
南而尤長水戰者也協守潮漳等處地方副總兵  
署都指揮僉事于嵩董西師而狼封煙掃總南鎮  
而鯉海波澄忠義不愧其家傳勇畧宜登乎壇拜  
廣東廣州海防叅將署都指揮僉事方伯沉毅能

謀明練有勇簡部伍而人懷敵愾飭樓櫓而海淨  
妖氛管廣東西山叅將事遊擊將軍署都指揮僉  
事李棟胸藏韜略志銳勲名練疲卒而簡閱有方  
守新區而禦侮足賴管廣東練兵遊擊將軍署都  
指揮僉事洪夢鯉才果敢而善策貌魁梧而小心  
坐營則戍士樂其投醪練卒則部曲勇於超距廣  
東都司軍政僉書署都指揮僉事陳居仁文雅足  
比儒流武略獨超儕輩征鯨海俘獲獨多握虎符  
勲伐自異原任恩陽守備今陞廣東都司軍政僉

書署都指揮僉事錢海英姿桓趙謀畧淵長坐談  
則志勵請纓撫馭則恩同挾纊原任柘林守備今  
陞兩廣軍門坐營廣東都司署都指揮僉事康九  
臯膂力方剛韜鈴兼習備海防舟師獨整司營務  
簡練惟勤廣東碣石水寨把總以都指揮體統行  
事指揮僉事戴恩錫長枝每能貫革勇力允足塞  
旗撫下有恩散糧無染廣東總兵標下坐營以都  
指揮體統行事指揮僉事麻鎮都器局整雅技藝  
熟閑從征屢效勤勞佐幕多攄籌畫廣東廣州後

衛指揮使阮維藩司篆久著清聲管鴻更徵調度  
才猷頗練志行甚端廣東肇慶衛指揮僉事卜紹  
勲清爽之資勤慎之行較射獨多中的管哨亦自  
超羣原兵部咨送兩廣軍門聽用福建龍巖千戶  
所正千戶石惟磐志悅詩書藝嫻騎射究心通雲  
鳥之陣搏髀銳汗馬之勲廣西思恩等處地方管  
理叅將事副總兵署都指揮僉事李應祥富韜鈴  
繭難功高於十寨紆籌策金湯勢固於三城久懋  
殊勞足膺上將分守廣西永寧地方叅將署都指

揮僉事白玉承家能讀父書爲

國耻營產宅守潯梧折衝鄰警移永寧撫戢夷情分  
守廣西潯梧地方叅將署都指揮僉事戴應麟貌  
瘠而藝優性醇而識敏司閫夙揚能譽分叅已著  
良籌廣西都司軍政僉書今陞掌印署都指揮僉  
事蔡春及武闡發跡水戰策勲僉閫政勵揚鷹之  
思督營操賈虢虎之勇廣西都司軍政僉書署都  
指揮僉事盧名世驍雄唾手武捷慷慨銳志兵機  
偉畧旣見於粵西長技尤堪於漠北原任永寧守

備今陞廣西都司軍政僉書署都指揮僉事孫世  
寶年資方壯韜畧夙閑指麾杜囂於交夷奮擊著  
功於寨寇守備廣西昭平地方署都指揮僉事武  
應隆貌偉才雄年青猷壯守孤城一方保障巡江  
道三載勲勞守備廣西慶遠地方以都指揮體統  
行事指揮同知孟宗文彎弧技擅穿楊拔寨勢如  
破竹無慚搏俎足備干城廣西總兵標下坐營以  
都指揮體統行事指揮使沈謩震敵雄姿能軍將  
種掌衛郤橫奔之叛卒當營鼓銳氣于操兵廣西

桂林中衛指揮同知童元鎮雄偉而畏慎存心忼慨而雍容決策半夜止浙兵思叛片言解村獍焚爭廣西柳州衛署指揮僉事張啓賢提兵曾翦蠻落守哨更練兵防籌效聚山勲期勒石以上各官雖材品不齊皆一時武弁之良內副總兵于嵩李應祥俱堪備大將之選叅將方伯白伍戴應麟遊擊李棟洪夢鯉都司陳居仁錢海康九臯蔡春及盧名世孫世寶俱堪備副叅之選而盧名世尤宜於北邊者也坐營麻鎮都沈蹇守備武應隆孟宗

文把總戴恩錫指揮阮維藩卜紹勲童元鎮張啓  
賢千戶石惟磐俱堪備都司守備把總之選者也  
又訪得分守廣東惠州陸路等處地方兼碣石水  
寨海防叅將署都指揮僉事成大儒狙詐是尚籌  
略無聞因權勢而躡陞久冒夤緣之誚以餽遺爲  
得計大開科剋之端先任都司已多物議料銀則  
倍索秤頭衛所受累而不敢訴濠租則加收火耗  
軍民懷怨而若罔聞兩經捧賀携盤費三千金動  
稱送人指揮馬紹思等可證一聞轉官侵公費三



百兩悉以入已都司鍾維岳等共知及任叅將益肆貪心信把總王耀甘爲猫鼠之眠任哨官張賢恣其漁獵之害中軍雜流旣乾沒六十名而各營各哨復寄二十名各取月糧入已哨官更役旣拜見三十兩而哨長隊長亦索三五兩方送道府收糧縱兵潛刼石橋被失主盧天賜等敵獲鎗筦兵法何存征蛋把截海口鄉平民尹元琮等盡奪船貨人心安在指當路賀禮斂銀一千盡充囊橐致營兵豎旗激變甚爲損威藉前道壽儀餽銀二百

進自鑄壘致同列諂媚成風尤可切齒廣東白鴿  
門水寨把總以都指揮體統行事廣州右衛指揮  
僉事陶應璋萎薈之資貪婪之性管香山多端釀  
釁陞雷海一味營私用書記李芳爲腹心致恣睢  
而莫制倚班頭李隆爲牙爪斂怨讟而弗知官兵  
旣索拜見矣而指稱年節葛布科斂尤多盛文華  
盧鳳科可證舊役旣扣糧銀矣而新補哨官捕盜  
需求滋甚李悅胡應祥可證通寨兵一千二十五  
名虛冒不啻百數其新兵劉君禮等扣送不一而

充囊者又八十有奇脩船銀一千四百五十六兩  
給領僅及七百其捕兵李清等侵分不計而入已  
者尚四百以外溪壑之欲已滿輒托病以告休戎  
伍之怨旣深乃高臥而不出官守大壞

國憲難容廣東白沙水寨把總以都指揮體統行事  
廣州左衛指揮僉事孫廷豪年未衰邁病日纏綿  
司防禦而不任驅馳循弊蠹而罔知釐革阿承得  
計縱哨官誅求軍士餽送何爲委靡無能被罷將  
挾取糧銀執持安在指公費則計兵扣銀五分催

收者健步潘明也補頭目則每名索銀參兩撥置  
者書手梁繡也放錢營利大鄙厭於衆心收汛愆  
期尤故違乎條令壞樓船一十五隻脩造之費甚  
多伊誰之咎溺軍兵二十餘名淪胥之禍可憫於  
心獨安雖值颶風之適然難辭統領之失職廣西  
柳州衛指揮使王言才本庸瑣年復衰遲褻如重  
聽耳不聞鈺鼓之聲跛爾難前足莫躡行陣之地  
執至親之船而奪其貨壠斷奚殊娶同官之婦而  
利其財冠裳大污卷案之告訐見存曾罔知乎悛

改圖冊之常例多索益自肆其侵漁哨守柳城片  
籌莫展督備遷邑百計私營貪鄙足羞誓尤叢集  
梧州千戶所署指揮僉事杜兆熊卑污之行貪縱  
之心任本所惟急營家管要鎮不履信地用伴僮  
楊三爲私人縱往來通透於其室結徭老劉德厚  
爲契長肆酣歌濁亂於其鄉兵額則虛冒九十名  
至陸川告警僅以其半而赴援兵糧則尅收三大  
錠至容邑行查始出其餘而湊補詐訪儒官王元  
魁以泄積忿人理何容捏報舍人龔瓚以復私讐

法紀安在矧其姦淫之污跡尤爲儕輩之羞稱以  
上五員內成大儒等四員俱應革去職任回衛閑  
住杜兆熊原經督撫衙門薦陞指揮僉事管理六  
雲地方今應降去職級仍以副千戶聽其立功自  
贖者也伏乞

勅下兵部再加查訪如果臣言不謬將呼良朋等量  
材擢用成大儒等革去職任杜兆熊降級廢武職  
知所勸懲而邊疆有賴矣

薦舉教職官員疏

題爲薦舉教職官員事臣奉

命總督兩廣今叨轉任其於所屬教職官員例應薦  
舉訪得廣東廣州府東莞縣儒學教諭林恒芳齡  
偉度型範無愧於鱣閣邃學清才器局允宜于虎  
觀潮州府普寧縣儒學教諭鄧脩賢清標出類遠  
志不羣學綜貫乎諸家識旁通於衆藝廣州府東  
莞縣儒學訓導鄧凌雲英年銳志雅識端操司教  
學擅橫經委署才優製錦惠州府博羅縣儒學教  
諭崔振臬博雅見推於士類允稱師模嚴飭取重

於儒林更堪民社廣州府連州儒學訓導王天麟  
冲雅之度淵邃之才志每勵于藏脩業可期于遠  
大廣州府新會縣儒學訓導馬堪丰儀郁雅孝行  
真純已馳芹水之聲無忝花封之任瓊州府陵水  
縣儒學訓導林立有學有爲知教知政懷邑振變  
夷之化陵庠成造士之功肇慶府高要縣儒學訓  
導車鶴年氣格超羣文詞逼古譽已騰於振鐸才  
復裕於鳴琴高州府電白縣儒學訓導汪梧寒守  
一羶不至有司之室勤敷五教足傾多士之心廣



西柳州府融縣儒學教諭蔣行可材握瑜而懷瑾  
學味腴而舉芳已興教於象璜宜蜚英於鼓笥桂  
林府興安縣儒學教諭鄧一純品藻詳明久洽青  
衿鎔鑄裋身端潔宜爲赤子依歸慶遠府天河縣  
儒學教諭趙一鵠淵源家學練達才猷模範著於  
絳帷政治優於墨綬平樂府儒學訓導方美中飭  
躬範士素敦百行之原宰邑臨民可期一割之用  
以上諸臣雖科貢不同要皆教職之賢內林恒鄧  
脩賢蔣行可俱堪六館之選鄧凌雲鄧一純等俱

堪民牧之寄者也伏乞

勅下吏部再加查訪如果臣言不謬將林恒等酌量  
擢用庶儒職知所興起而風教不無少裨矣

郭襄靖公遺集卷之八終